

Semper el a reconocé boluntad di e pueblo

Awe nos kier re-produci e promé palabranan di Betico Croes, despues cu MEP a perde 20% di su votonan, y consecuentemente e mayoría absoluto cu MEP tabatin pa basta aña.

E promé reaccion di Betico Croes tabata: *"Materialismo a gana riba idealismo. Den e sentido aki, cu despues di hopi aña pueblo di Aruba pa motibo di e ideal, e libertad di e pueblo aki a respaldá MEP, pero despues pa motibo di seramento di Lago cu medidanan impopular mester a worde tumá y cada uno a sinti materialmente den su cartera, den su hogar, su presupuesto, cu e medidanan aki ta afectá cada hogar, mi ta kere cu pueblo di Aruba a lubidá, no den su totalidad, pero un parti grandi, e ideal cu nos a lucha p'e."*

"Y a keda pensa mas riba e parti material y esaki nos ta hayé lamentabel".

Segun Betico Croes na tal ocasion a bisa mirando e resultado toch no por bisa cu MEP ta completamente abatí, pasobra 13.800 votador a duna MEP su confianza. Esey ta nificá cu MEP a keda como e partido mas grandi na Aruba.

E 13.800 votadornan, apesar cu nan a weita con Lago a sera su porta, cu medidanan impopular mester a worde tumá, mester a enfrentá 4 partido político, a pone cu e tabata un tarea casi sobrenatural pa por a haya atrobe un mayoría absoluto, segun Betico Croes.

"Ami por bisa, y manera nos lema tabata semper, Vox Populi, Vox Dei. Pueblo di Aruba a expresá su mes masha cla. Esaki ta nificá cu nos tin cu respetá boluntad di e pueblo aki.

Mi por agregá si despues di hopi aña, pa motibo di e lucha di nos pueblo, un partido cu determinantemente a lucha fuertemente pa e libertad di su pueblo, awor cu nos ta na víspera di su realizacion, no solamente pa e parti económico cu a bai atras, sino tambe pueblo a scohe pa diversificá e poder, e check & balances y kizas hopi biaha ta bon pa un bon funcionamiento di e democracia, aunke nos a deseá di mantené y retené e mayoría", tabata palabranan di Betico Croes.

posibilidad di un coalicion cu AVP, e lider político di MEP a bisa cu su partido a bai den e campaña electoral aki den un ambiente festivo y armonioso, tratando di yega na un unidad.

Pasobra pa motibo di e trascendencia di e fecha di 1 di Januari 1986, realizando e Status Aparte, nos a kere cu lo ta bunita pa tur hende di afó mira nos pueblo uní den un Gobierno, esta tin un Gabinete Nacional cu tur partido político.

Pero durante diferente

foro y campaña, e otro partidonan a excluí e posibilidad ey, manera partidonan, PDA, PPA, ADN y últimamente partido AVP di traha cu MEP.


"Ami no t'aki pa dicidí awe nochí pa MEP. Mi ta laga esaki pa Consejo di Partido tuma su postura riba esaki, pero esaki ta dependé tambe si e otro partidonan kier bandoná nan punto di vista tumá den confianza pa cooperá cu MEP.

Na e momento aki MEP ta

e partido mas grandi ainda y ta worde yamá pa e informador sali for di su seno, pero

esey no nificá cu ta MEP so por forma un Gobierno", segun Betico Croes. □

G. F. BETICO CROES



Bao di Bo guia, lucha y perseverancia, nos Pueblo Arubano a obtene su Status Aparte den Reino Hulandes. Un hecho di gran transcendencia Historico. Nos lo sigui recorda Bo como nos Heroe Nacional; e tata di Nos Pais Aruba.